

յամենայն մենաստանս Երուսաղէմի, նաեւ շուրջ զերուսաղէմաւ ուր էին վանօրայք Հայոց :

Անաստաս վարդապետս Յերապօլսեցի 'ի խնդրոյ բարեպաշտ իշխանին Համաղառպայ Կամսարականի Պաշտօնունեաց գրեալ զայսոսիկ ետու նմա, որ կամէր գնալ 'ի Ս . Երուսաղէմ, որ և գնաց իսկ և արժանացաւ աստուածակոխ Ս . Տեղեացն, յորս շրջեցաւ Տէր Յիսուս 'ի մարդանալն իւրում, եւ 'ի Հայրապետէն Ս . Երուսաղէմի Թափեալ ազատեաց զամենայն վանօրայոն Հայոց անկելոց ընդ բռնութեամբ Յունաց, որք կամէին փոխել զկարգ և զսահմանս նոցա, եւ յեղաշրջել 'ի հաւատս՝ զոր քարոզէին յայնմ ժամանակի Յորենալ Քաղկեդոնիկ Հայրապետն Երուսաղէմի :

Բայց սակայն յետ ժամանակաց ինչ և աւուրց սկսան նեղութիւնս տալ եւ տանջանս հարցն Հայոց Պատրիարքունք Յունաց սակս ոչ հաւանելոյ նոցա Ժողովոյն Քաղկեդոնի : Եւ միարանեալ ամենայն Հարք եւ առաջնորդք անձինք 500 գրեցին առ Երանելի Կաթողիկոսն Յովհան, և այլ աթոռակալսն, թէ զի՞նչ պարտ է առնել . հաւանի՞լ նոցա և ունել իւրաքանչիւր զտեղի բնակութեան իւրեանց, եթէ թողուլ եւ ելանել անտի . վասն զի հրաման թագաւորին Յունաց օր ըստ օրէ խստանայր 'ի վերայ քաղաքին Երուսաղէմի եւ 'ի վերայ Հայրապետացն մերոց . զի մի ոք բնակեացի անդ 'ի Կրօնաւորացն Հայոց, և Յակոբիկ Ասորի, և կամ յեգիպտացւոցն . այլ միայն բնակեացին այնք, որք ունին զգաւանութիւն թագաւորին եւ զսահմանադրութիւն Յորենալի :

Առ այս գրեաց Կաթողիկոսն Հայոց, թէ վասն հաւատոյ մի հնազանդիք դոցա, այլ թողէք և արտաքս գնացէք 'ի քաղաքէդ այտի : Վասն որոյ բազումք թողին ըզվանօրայս և զինչս իւրեանց և 'ի բաց գնացին . ոմանք չոգան յեգիպտոս, ոմանք գնացեալ բնակեցան 'ի Կեսարիա . և բազումք եւս 'ի տեղովէ իւրեանց ո՛չ չարժեցան և ո՛չ գնացին յայլ ուրեք, այլ կացին և մնացին 'ի տեղիս իւրեանց՝ համբերելով բազմաց նեղութեանց, աւարառութեանց, գանից և տանջանաց . մինչեւ տիրեցին Տաճիկք աշխարհին Պաղեստինոյ և Երուսաղէմի . և այնուհետեւ